

陶雲汀先生奏疏

奏疏卷二十七目錄

撫蘇稿

安化陶澍

搭運緩漕三成併酌留糶變摺子

總督會稿

籌款挑濟孟瀆潞河摺片

籌撥口糧銀款摺子

總督會稿

請停揀發佐雜人員摺子

恭謝

頒賞詩集摺子

重運漕船掃數渡江摺子

查明緩漕分別搭運借撥糶變摺子

清查案內虧缺倉穀酌分年限買補摺子

恭謝

頒賜巡幸盛京詩摺子

恭謝

御賜藥錠摺子

捐辦義倉請獎摺子

飭單假照案內各犯情形摺片

籌補續歸無着銀款摺子

單獲假照案內要犯摺子

遵辦查抄要犯寓所摺子

覆訪學謝孚宸摺片

搭運緩漕三成併酌留糶

奏爲蘇省各年徵存緩漕米石

搭運三成其餘仍請糶變祈

用以速全漕仰祈

聖鑒事竊照道光九年冬起運新漕欽奉

諭旨令於今年前四月內全數價抵清江尅期渡黃
等因欽此欽遵在案茲據蘇州布政使梁章鉅
蘇松督糧道陳鑾會詳稱各屬徵收糧米現在
趕緊兌開惟上年秋冬曠時日久蘇松常鎮各
府州運河淺阻難行此外支河汊港俱形乾涸

查本年起運新漕米數本多糧船負重節節須車水灌濟兼用小船分載若將各年緩漕一併起運船身喫水更深剝運維艱恐致遲誤請將緩漕米石酌量搭運俾新漕迅速其餘各米請照成案及現在時價酌中定議每石庫平紋銀二兩一錢暫行糶變提存司庫籌辦水利按年攤徵還補詳請核

奏前來查此項緩漕節年徵存約計二十餘萬石前經臣會同督臣議請糶變爲挑辦瀏河之用按畝攤徵還款嗣經部覆仍令全行搭運赴通

因幫船開行趕辦不及奏奉

諭旨留俟下年搭運欽此現在併有九年分續徵遞
緩之米均應搭運先經該糧道分數派幫催飭
趕兌據詳前情

臣

與督

臣

復經札商上年秋冬

大江以南雨雪稀少各處河道淺阻現自丹徒
橫閘以南逕丹陽境內至常州之奔牛地方中
間百數十里僅存涓流一線官民往來概係捨
舟從陸向來徒陽運河專藉江潮灌注一交冬
春水勢時有不足亦從未有如目前淺阻之甚
至各州縣兌運水次多在內河更屬淺小卽車

水灌運雇船剝淺已屬萬分難支若再將緩漕起運船身愈形笨重轉慮遲滯正漕併恐耽延時日不能趕副

欽限則渡黃必更費力殊於大局攸關再四籌維不得不相機辦理除九年分新漕米石應卽全行起運外所有各年徵存緩漕米石查照現在水勢情形止可酌數搭解三成隨同正漕起運以裕

天儲其餘七成現查江寧省倉及各營有災缺兵米應行籌撥俟查明款數另摺請撥外下餘之米

均係連年徵存在倉江南地方近海潮濕梅雨薰蒸未便久貯致滋霉黯兼恐不肖州縣因存倉米數較多或致虧挪成缺應卽仿照歷屆糶變成案按時價酌定每石庫平紋銀二兩一錢暫行糶變提存司庫卽借爲挑濬河道之用按畝攤徵還款一俟徵完察看年歲豐稔米價相平仍行買補搭運於倉儲無虞虛缺而農田水利均得及時修辦更於

國賦有裨所有臣現籌搭運緩漕米石及酌留糶變情形謹會同大學士兩江總督臣蔣攸銑漕

運總督臣朱桂楨合詞恭摺具

奏伏乞

皇上聖鑒訓示謹

奏

道光十年正月初四日具

奏二月初四日奉到

硃批另有旨欽此又同日奉到道光十年正月十九

日內閣奉

上諭陶澍奏搭運緩漕米石請酌留糶變一摺江蘇省節奉徵存緩漕米石均各隨同正漕起運茲據

該撫奏稱運河淺阻難行若將緩漕全行搭運船身愈形笨重轉慮遲滯正漕請酌留糶變爲籌辦水利之需着照所請所有各年徵存緩漕米石准其酌數搭解三成其餘七成除江寧省倉及各營有災缺兵米應行籌撥外下餘之米著循照成案按時價每石庫平紋銀二兩一錢暫行糶變提存司庫卽借爲挑濬河道之用按畝攤徵還款一俟徵完察看年歲豐稔米價相平仍行買補搭運該部知道欽此

籌款挑濬孟漬瀏河摺片

再臣查蘇松常鎮太倉四府一州地方縱橫不過五六百里而錢漕各項歲需二三百萬因其地濱江湖且灌且洩旱澇無虞是以地雖小而賦稅足供詎自數十年來河道淤塞田畝每致歉收如道光三年水災其明驗也公私傷損至今元氣未復是水利一事於東南財賦之區尤爲切要前於道光七年八月欽奉

諭旨令臣同督臣籌款挑濬其時已將吳淞江挑工議請於七年平糶緩漕米價銀兩借動銀二十

六萬五千餘兩勘估興工旋於八年二月工竣

仰蒙

恩旨將所借平糶緩漕米價銀兩卽作爲挑浚吳淞江經費就款開銷其瀏河白茆孟瀆等處併經臣等於收工摺內附片聲明分年籌辦嗣於八年十二月議請借糶七年徵剩及八年帶徵緩漕挑浚瀏河攤徵完款經部議駁查瀏河工費較鉅估需銀三十餘萬別無閑款可籌是以覆議暫緩興工惟該處係三江之一爲蘇太等屬農田水利蓄洩最要之區勢難久任淤墊併查

孟瀆一河地在常州其水從武進縣東北大江
邊引納潮汐逶迤數十里至縣西北之奔牛閘
地方入運與丹陽下游河水會合每遇上游徒
陽運河興挑官民及商貨船隻均由孟瀆河通
江出入下達蘇杭上達鎮江實爲京口徒陽河
道之副而常屬武陽等縣農田之蓄泄尤以此
河爲關鍵自嘉慶二十年後久未挑濬湮塞不
通一遇徒陽築壩興工江廣船來無路可入動
須避道海口險遠難行蘇常等屬每至無米接
濟而本地農田焦涸或須戽水於數里十數里

外以資灌溉實係民商交困亦係萬不可緩之
工現在各屬緩漕米石除搭運三成及撥補災
缺兵米外約計尙剩米十數萬石因運河枯淺
議請留省糶變仰懇

天恩暫借爲濶河孟廣河挑濬工用一體攤徵歸款

除飭司道確勘估計臣仍親往履勘另請

奏辦外合先附片陳明伏乞

聖鑒訓示謹

奏

道光十年正月初四日具

奏二月初四日奉到

硃批覽欽此

籌撥口糧銀款摺子

總督會稿

奏爲動撥

恩賞貧民口糧銀款仰祈

聖鑒事竊

臣

等接准部咨道光十年正月初四日內

閣奉

上諭上年江蘇省沛縣被水業經降旨緩徵小民自可無虞缺乏惟念今春青黃不接之時民力未免拮据着加恩將沛縣勘不成災之坊一等十二里乏食貧民賞給一月口糧以資接濟用示朕軫懷民瘼廣布春膏至意該部卽遵諭行等因欽此仰

見

聖主惠愛黎元有加無已之至意當卽轉行藩司欽遵并刊刷謄黃遍行曉諭一面確查實需銀數請撥去後茲據江寧布政使賀長齡詳稱據徐州府稟稱沛縣道光九年被水勘不成災之坊一等十二里乏食貧民欽奉

恩旨今春賞給一月口糧約計需銀一萬六千八百兩請先撥發等情查司庫正項內道光九年分地丁一款現有存銀應請卽於此款內撥用設有不敷卽於司庫正項銀內酌量找撥其貧生

口糧銀兩照例於存公款內支用事竣核實報銷詳請

奏明撥用前來臣等覆加察核據請口糧銀一萬六千八百兩係計口授食之需自應預爲籌備相應恭懇

天恩俯准按數動撥以資散放事竣核實造報如有餘剩報部撥用除飭該管道府督令印委各員趕查戶口核實散給務使貧黎均沾實惠仍隨時嚴密訪察如有胥役尅扣冒濫等弊立即據實嚴叅究辦所有動撥沛縣口糧銀款緣由謹

合詞恭摺具

奏伏乞

皇上聖鑒謹

奏

道光十年三月二十四日具

奏四月二十四日奉到

硃批另有旨欽此又同日奉到道光十年四月初十

日內閣奉

上諭蔣攸銛等奏勸撥恩賞貧民口糧銀欸一摺江蘇省沛縣坊一等十二里乏食貧民前經降旨今

春賞給一月口糧茲據奏約需銀一萬六千八百兩着准其在司庫道光九年地丁一款存銀內撥用倘有不敷卽於司庫正項銀內酌量找撥其貧生口糧銀兩照例於存公款內支用事竣覈實報銷如有餘剩報部撥用該督等卽飭該管道府督令印委各員覈實散給務使貧黎均沾實惠如有尅扣冒濫等弊卽着嚴叅究辦該部知道欽此

請停揀發佐雜人員摺子

奏爲佐雜人員壅滯恭懇

聖恩俯准暫停分發以期漸次疏通仰祈

聖鑒事竊照捐納人員分發各省原期効力當差學習吏治試用期滿接班補用所以收指臂之助而廣登進之階惟是人數過多卽形壅積江蘇省佐雜自從六品至未入流僅止二百三十七缺今查在省候補試用及現在酌增常例頭二卯分發人員陸續到省共已有二百二十五員每年出缺請補約計不過十分之一二名次在

先者尚可守候其名次在後者補缺無期卽差
委署事亦須數年始能輪及而久閑在省類多
薪水不繼實屬調劑爲難若再源源分發益難
位置現在直隸山東河南等省均因人數繁多
奏蒙

諭旨允停分發江蘇壅滯情形尤甚應請援案將捐
納佐雜各項人員暫停分發來蘇以疏壅滯據
藩臬各司會詳請

奏前來仰懇

聖恩

勅下吏部將酌增常例頭二卯及各例捐納簽掣佐
雜自從六品起至未入流止各項人員暫停分
發來蘇俟各班漸次疏通後再行

奏請照常分發庶試用人員不致更加壅滯是否
有當伏乞

皇上聖鑒訓示謹

奏

道光十年三月二十四日具

奏四月二十四日奉到

硃批另有旨欽此又同日奉到道光十年四月初十

日內閣奉

上諭蔣攸銓等奏佐雜人員壅滯請暫停分發一摺
江蘇省試用佐雜人員據該督等查明現在需次
者俱已人浮於缺着照所請將酌增常例頭二卯
及各例捐納簽掣佐雜自從六品起至未入流止
各項人員暫停分發俟各班漸次疏通再請照常
分發該部知道欽此

恭謝

頒賞詩集摺子

奏爲恭謝

天恩事頃差弁回蘇資奉

御製詩初集全部

頒賜到

臣謹卽郊迎至署望

闕叩頭祇領跪誦之下忻佩難名玉振金聲宛覩
鈞天之雅奏星輝雲潤宏開

盛世之光華欽惟我

皇上稽古垂謨

數言

錫極

泳仁游藝緝熙繩日月之功

握符闡珍煥發啟乾坤之祕緬昔

璫編養正咸美哉而頌始基迄茲

奎製緘初更哀然而成

鉅集天下之文在於是莫匪親賢樂利之遺

聖人之情見乎詞彌深

夙夜幾康之警

發號施令豈乏咨詢

享

帝尊

親如聞般賚相小民安於耕鑿敢忘靈雨桑田知大計
重在河漕不唱秋風瓠子千尋玉海南船興挽
粟之歌十曲金欄西極送吹鐃之響若乃於臺
於沼同樂亦及禽魚偶爾在水在山振籟非關
絲竹是蓋

聖惟時憲聲與政通經天緯地之謂文無非事者化
民成俗必由學於此徵之

鴻疇既省歲爲程

龍紀復按年可考比隔八而生六律是曰黃鍾大呂
之音欲襲六而成一經快誦清廟明堂之什

臣

學慚窺管心切近

光仰惟

制作之

高深倍切軒轅於鼓舞憶昨趨承

芝殿十二番親領

堯言睹茲臯解

薰延廿四卷載歌

舜律唐虞之際斯爲盛允欽蕩蕩巍巍雅頌所稱何

以加益識元元本本從此

宸篇愈富

聖敬恒躋三百篇可蔽一言願誦詩而聞

政教一二日維熙庶績景

勅命而效廣殿所有

微臣

感佩忭幸下忱謹繕摺恭

謝

天恩伏乞

皇上聖鑒謹

奏

道光十年四月十一日具

奏閏四月十二日奉到

硃批知道了欽此

重運漕船掃數渡江摺子

奏爲蘇省重運漕船業已掃數渡江並浙江幫船
跟接饋渡計日全竣緣由仰祈

聖鑒事准漕臣咨會道光十年四月初四日奉到

上諭朱桂楨奏蘇州重運幫船未能遵照向例隨同
首進各幫過淮盤驗請交部議處等語向來首進
幫船過淮盤驗總有蘇州重運數幫隨同截數據
該漕督查明因蘇常一帶運道淺澁蘇州首幫僅
祇離次在後各幫仍未跟接前進該督督催不力
著照所請交部議處蘇松糧道陳鑒於該地方官

乞淺催剝事宜未能先事豫籌着一并交部議處
竝着陶澍嚴飭該地方官認真上緊撈挖多備剝
船起運務令依次抵壩渡黃勿再延誤干咎欽此
移咨到臣伏查蘇省漕糧重大本年兼有搭運
緩漕米石經臣

奏請酌帶三成餘畱糶變以冀船身稍輕俾資迅
速竝派委撫標中軍及城守營叅將執持令箭
分赴各屬催僨兌開其運河著名淺處早經挑
挖盡仍飭道府各屬於支河汊港一并設法
挑濬加深無如自冬徂春雨雪久稀各處河道

膠淺人力難施雖挑挖加深別無生水之法正
深焦急至地方官代雇剝船一節惟北河有之
載在漕運全書大江以南向例所無而值此時
暵水淺州縣中多有非剝不行之處不得不通
融辦理業於新年內外代爲雇備交幫多者數
百少者數十通計剝船不下三四千號內河之
船已罄外口之船難入勢更無船可雇而米歸
剝船仍然水淺難行實係從來罕有之事幸賴
聖主洪庇於三月初旬大雨數日各船暢行除常鎮
各幫早已抵淮列入三月十六日首進截數船

內其蘇州首幫亦於十八日過淮在後各船因江口連日西風未能放渡至四月初七日掃數渡江北上計蘇省漕船共四十三幫爲船二千一十一隻俱已完竣伏查前奉

諭旨來年係閏四月辦理新漕爲期較寬仍須迅速兌開總令於前四月內儘至清江以便渡黃等因今蘇船抵壩僅止數程爲期尙早催漕各員弁均屬竭力而糧道陳鑾親蒞各處晝夜籌催經理有方故能於水枯風逆之際仍然一氣呵成毫無貽誤辦理實屬認真至浙江糧船已據沿

途催漕各員稟報於四月初九日全入鎮江境
內截至是日已渡江船二百七十四隻下剩嘉
白等幫僅止六百餘隻約計風色平順一二日
內即可掃數全竣不致有誤限期堪以仰慰
宸厪所有糧船渡江情形謹繕摺具

奏伏乞

皇上聖鑒謹

奏

道光十年四月十一日具

奏閏四月十二日奉到

硃批知道了欽此

查明緩漕分別搭運借撥糶變摺子

奏爲遵

旨查明蘇省節年緩漕米石分別搭運借撥糶變數
目並道光九年分緩漕米石仍俟下年搭運各
緣由仰祈

聖鑒事竊查本年正月內運河淺阻難行經臣

奏請將搭運緩漕米石酌帶三成下剩七成除借
撥兵米外餘留糶變爲籌辦水利之需按畝攤
徵還款欽奉

諭旨允行欽此轉行各屬遵照在案嗣准戶部咨稱

此項緩漕米石前次奏請糶變摺內聲明道光八年帶徵歷年緩漕及七年徵剩之米約計二十餘萬石今事隔一年該撫摺內亦止稱二十餘萬石仍係前摺所奏之數是九年帶徵之米不在此內應查明若干仍俟下年搭派運通且現在總數若干搭運三成若干留省七成內借撥兵糧及糶變米若干均應分晰確數報部查核又所稱挑浚河道需費若干按畝攤徵歸款亦應酌定年限按照各款詳細查明報部辦理等因於道光十年二月初六日具奏奉

旨依議欽此咨照前來復經

臣

轉飭司道分晰查辦

去後茲據蘇州布政使梁章鉅蘇松糧道陳鑾
會詳稱蘇松各屬道光八年帶徵歷年緩漕及
七年徵剩之米前於道光八年冬詳奏糶變案
內聲明約計二十餘萬石今溯查當時細數計
米二十二萬二千六百六十九石八斗一合內
除道光九年因災遞緩米一萬八千九百九十
二石四斗六升二勺外實該米二十萬三千六
百七十七石三斗四升八勺內已飭派各幫船
搭運三成正耗并支給五米共六萬二千四百

六十六石三合七勺又撥江寧所屬災缺兵糧
米一萬七千三百九石七斗三升二合三勺計
尙存米一十二萬三千九百一石六斗四合八
勺應遵奉

諭旨暫行糴變提存司庫卽借爲挑濬河道之用其
道光九年冬又有應行帶徵各年緩漕共米六
萬七千五百九十四石一斗八升八合七勺內
除道光九年秋收被歉遞展米三萬七千三百
九十三石八斗一升五合外實應徵米三萬二
百石三斗七升三合七勺內已飭派幫船搭運

正耗并支給五米共一百四十五石六斗四升
七合計應存米三萬五十四石七斗二升六合
七勺遵照部行仍俟下年派搭運通再查派搭
三成緩漕前以八九等年統算計應派運米七
萬一百餘石因冬底春初各縣水淺糧艘不能
負重適行僅止派搭米六萬二千六百餘石此
時剔畱九年分應徵緩漕祇照八年以前米款
驗算應運三成米六萬一千一百餘石業經派
幫兌運并支給五米共六萬二千四百六十六
石零計與三成之數有贏無絀至挑漕河道工

費及攤徵年限另行專案查議詳辦合并聲明等情臣查前項緩漕米石本係應行搭運之款因值水枯船重恐致稽誤正漕不得不酌量籌辦嗣接部咨九年分緩漕仍俟下年搭運自應照辦其八年以前之米欽遵前奉

諭旨糶變提存司庫勒限解清倘有支延卽行叅辦至江蘇河道阻塞不一而足惟吳淞江一處業已挑訖甚爲通暢而上游各湖河及下游白茆等處尙難措手其瀏河工程前奉

諭旨挑濬祇以工鉅費繁無款可籌日形壅滯田畝

乏收其孟瀆河道前經臣於吳淞江工竣時卽
經附片奏蒙

聖鑒在案該處近隸常州不在徒陽歲挑之列而於
運河下游亦資灌注農田水利尤關緊要其相
近之得勝河澡港及武陽城外各河多有淤塞
均係不可緩之工應須一併辦理現蒙

聖明俞允借帑興挑間閭有賴惟事體重大一切夫
工挑濬按畝攤還各章程今昔情形稍有不同
現當大雨時行難於履勘應俟糶米銀數提齊
通盤籌算或孟瀆諸河與瀏河同時併舉或先

挑瀏河再挑孟濱諸河均俟委員確勘估計熟
籌核議另行

奏辦所有節年緩漕數目除咨部查照外謹會同
大學士兩江總督臣蔣攸銛漕運總督臣朱桂
楨合詞恭摺覆

奏伏乞

皇上聖鑒謹

奏

道光十年閏四月初九日具

奏五月十一日奉到

硃批戶部知道欽此

清查案內虧缺倉穀酌分年限買補摺子

奏爲查明二次清查及官墊民欠叅虧各案註銷
原缺常平倉穀酌分年限領買歸倉以資儲備
仰祈

聖鑒事竊照道光元年豁免案內江蘇各屬註銷嘉
慶十四年以前二次清查虧缺及官墊民欠常
平倉穀均應照因遞缺穀之例動用正項採買
先經

臣奏明此項穀石每石例價正銀六錢不敷甚多若
責令現任同時採買爲數甚鉅賠貼較難請寬

以時日分年買補仰蒙

俞允令飭藩司查明各州縣地方情形應行買補穀數分定年限奏明辦理等因欽此卽經轉飭欽遵查辦去後今據江寧布政使賀長齡蘇州布政使梁章鉅將各屬二次清查及官墊民欠案內註銷穀數並聲明各屬叅案虧缺豁免倉穀亦係應動例價買補之款應一并分年採買飭據各屬分定年限又宜興縣二次清查缺穀四千石原開折價銀五千兩已經前縣李敷文挪墊買補待撥歸款但原開折價浮於例價未便照

原價撥給應仍給例價銀二千四百兩其墊缺不敷銀二千六百兩仍歸李敷文名下追賠歸款開冊詳請具

奏前來臣查江蘇省二次清查及官墊民欠叅虧各案豁免註銷常平倉穀均應動項買補核計江淮等屬原缺穀九萬五千四百三十石零按照例價每石銀六錢該銀五萬七千二百五十八兩零蘇松等屬原缺穀一十一萬二千一百四十二石零例價該銀六萬七千二百八十五兩零內除宜興縣已買穀四千石實在未買穀

一十萬八千一百四十二石零據請分限買補
自兩年至十年不等均係各按地方情形酌量
定限自應俯如所請年限按年領價買補以實
倉儲其穀價請卽從道光十年秋成後起由藩
司於正項地丁銀內按年撥給採買歸倉入於
每年倉穀奏報案內造報如所定年限之內該
州縣遇有災歉竝請准予展限領買免致有妨
民食所有江蘇省豁免註銷缺穀遵

旨議定分年買補緣由謹會同大學士兩江總督

臣

蔣攸銓合詞恭摺具

奏並開繕清單敬呈

御覽伏乞

皇上聖鑒訓示謹

奏

道光十年閏四月二十六日具

奏五月二十四日奉到

硃批依議戶部知道欽此

恭謝

頒賜巡幸盛京詩摺子

奏爲恭謝

天恩仰祈

聖鑒事頃由差弁賫奉

御製巡幸盛京詩一部

頒賜到臣謹卽出郊跪領至署盥誦之下仰見我
皇上志切繩

先心殷紹

聖善爲繼而善爲述

陶雲汀先生奏疏卷二十一
神模悉稟夫

高

曾格有

廟而格有家

法駕爰臨夫豐鎬奉

慈輿而將

茂典

養侍維勤因耆定而

告成功

勤歸有赫

橋山弓劍當年之風雨如聞

原廟衣冠率土之共球畢萃升香而

隆恩殿啟酌匏則

停敘筵開霜馬雲梯

英謨髣髴糠鉦上壁

儉訓留貽十亭二木之間想見

一心

一德四塔三關之外長環千水千山允惟

帝業之艱難敢忘歌頌彌益

聖功之巍煥盛有文章寫登樓出塞之雄風宛爾秋

橫馬上聽

賜復

蠲租之部諺帶回春到人間凡此聲金振玉之

鴻詞莫匪法

祖勤民之

實蹟幽館流觀而後鮮睹祠宮高山荒度之餘頓開

制作

微臣

緣慳豹尾測抱蠡衷譜卿雲復旦之辭難

名

舜孝誦清廟生民之什倍郁

周文記第頌於金門十聯詩在願長歌夫玉檢

萬歲籌增所有臣佩頌欣忭下忱謹繕摺恭謝
天恩伏乞

皇上聖鑒謹

奏

道光十年五月十五日具

奏六月十六日奏到

硃批覽欽此

恭謝

御賜藥錠摺子

奏爲恭謝

天恩事頃

臣

摺并回蘇奉到

御賞藥錠一匣謹卽恭設香案望

闕叩頭祇領欽惟我

皇上保艾綏猷

調薰鬯物

沖和在抱陰陽宣七舉之宜

仁壽同躋老幼被四生之澤人占勿藥

帝念如傷際茲地臘之辰敬拜

天珍之貺神砂鍊就有屑皆霜靈藥研成無苗不玉
恰值芳香之節序荷淨三庚拈來綵縷之輝光
粽新九子臣質慚蘭蓄情切蒲依忝叨佳劑之
寵頒快共羣黎而

德徧十三次

上方賜食草記冬榮百千粒寶鼎分馨

恩宏夏庇比壬癸六符而製佩消暑功多變丙丁五
政以凝辰

當陽

治普所有臣感激悚幸下忱謹繕摺恭謝
天恩伏乞

皇上聖鑒謹

奏

道光十年五月十五日具

奏六月十六日奉到

硃批覽欽此

捐辦義倉請獎摺子

奏爲太湖嘉定二廳縣捐辦義倉有成恭摺

奏請獎敘以昭激勸仰祈

聖鑒事竊惟民以足食爲先有備始可無患臣前在安徽巡撫任內曾通飭各屬捐置義倉以豐歲之有餘備荒年之不足當將辦理章程奏蒙

聖鑒在案嗣調任江蘇亦經照案通飭遵照茲據蘇州布政使梁章鉅詳稱現查蘇州府屬之太湖廳據報共捐義穀一萬石合紋銀一萬兩存典生息以備歉歲賑糶又太倉州屬之嘉定縣收

捐錢二萬一千串發典生息遇荒糶濟據各議
立章程均屬因地制宜自應各聽其便除飭令
妥爲經理外所有捐銀紳士應請分別獎敘以
資鼓勵具詳請

奏前來臣查建設義倉捐輸穀石以一邑濟一邑
之衆而不患其不均以數歲救一歲之飢而不
虞其不給實爲備荒要策各屬現已陸續舉辦
太湖嘉定二廳縣勸捐尤力所有樂善好施及
出力之董事均堪嘉尚自應先請獎敘俾得早
沐

恩榮亦使各屬知所觀感除嘉定縣捐戶銀數俱係零星應由縣酌量示獎外所有太湖廳捐穀價銀一千兩以上之候選鹽運司運副徐學異舉人捐郎中銜葉長福布政司經歷銜葉國均監生葉承塹朱鳳岡捐銀六百兩之職監潘良效周奕鑑捐銀四百兩之監生席世沅捐銀三百兩之河南蘭儀同知王仲芳河南下北河同知加知府銜朱長垣職監汪振槐監生徐學誠及出力之董事候選州吏目劉運蓁監生萬方惟鄭榕嘉定縣出力董事揀選知縣秦炳監生秦

鑑仰懇

聖恩俯准交部議敘內太湖廳紳士徐學異葉長福
捐銀較多復出力董理應請從優議敘所有勸
辦妥洽之太湖同知劉鴻翽前任嘉定縣知縣
捐陞道員淡春臺竝懇

聖恩交部議敘以示鼓勵除紳士履歷冊查取咨部
外謹會同大學士兩江總督臣蔣攸銛合詞恭
摺具

奏伏乞

皇上聖鑒

訓示謹

奏

道光十年五月二十七日具

奏六月二十九日奉到

硃批另有旨欽此同日奉到道光十年六月十四日

內閣奉

上諭陶澍奏捐辦義倉紳士懇恩獎敘一摺江蘇太湖嘉定二廳縣建設義倉捐輸穀石據奏出力紳士請分別議敘自應量予恩施着照所請所有太湖廳捐穀價銀一千兩以上出力董理之候選鹽

運司運副徐學異舉人捐陞郎中銜葉長福俱着
交部從優議敘其捐銀一千兩以上之布政司經
歷銜葉國均監生葉承塋朱鳳岡捐銀六百兩之
職監潘良效周奕鑑捐銀四百兩之監生席世沅
捐銀三百兩之河南蘭儀同知王仲滂河南下北
河同知加知府銜朱長垣職監汪振槐監生徐學
誠及出力之董事候選州吏目劉運葵監生萬方
惟鄭裕嘉定縣出力董事揀選知縣秦炳監生秦
鑑俱着交部議敘其勸辦妥協之太湖同知劉鴻
翺前任嘉定縣捐陞道員淡春臺俱着一併交部

議敘以示鼓勵該部知道欽此

飭挈假照案內各犯情形摺片

再臣於本年五月十九暨二十一二十五等日先後承准軍機處字寄欽奉

諭旨飭挈蔡繩祖等私給假照案內逸犯蔡應聯任松宇劉東昇賞濬姚鳳山等解京審辦等因遵卽立傳長洲元和吳縣各令飛速密挈卽據查得吳境敦厚堂內曾有蔡姓客人任過卽係蔡應聯據稱因討賬來蘇要回杭州又稱要赴揚州業於五月十三日與其表戚馬懷玉起身同去又查得劉東昇於三月內曾與販賣玉器之

直隸天津縣人李廷瑞至程四房卽程鴻發客店內同住前署華亭典史金寶山係其母舅劉東昇前往探望回寓後已於五月十五日同李廷瑞仍返天津復委員馳赴金寶山寓內搜查竝無劉東昇藏匿據稱劉東昇於閏四月初四日來華亭借貸盤費無措留住七日卽去據說要同販玉器人李姓由天津回京實不知其犯案等情臣查蔡應聯劉東昇二犯雖先期避遁已有蹤跡可尋其任松宇等由京聞風潛逃勢必此挈彼竄均應嚴密截拏俾無漏網臣現已

遴委各員分路查拏札行臬司通飭各屬密速偵緝竝飛咨直隸安徽浙江等省一體跟蹤捕以期速獲謹先附片覆

奏伏乞

聖鑒謹

奏

道光十年五月二十七日具

奏六月二十九日奉到

硃批覽欽此

籌補續歸無着銀款摺子

奏爲籌議江蘇省三次清查案內續歸無着銀款
請俟原報無着彌補清完之後接續提補恭摺
奏祈

聖鑒事竊照江蘇省三次清查案內原報無着銀六
十萬餘兩奏准各屬酌提羨餘彌補其清查應
追各款內日後追繳無完家產盡絕續歸無着
銀兩將來如何籌補原定章程本未議及據江
蘇兩藩司議請照戶部常例辦理經

臣

奏奉部覆以清查虧款與隨時追款不同礙難照

常例辦理行令另行妥議不可再行派累州縣亦不可使續報無着之款終歸子虛等因又經轉行遵照去後茲據江寧布政使賀長齡蘇州布政使梁章鉅會詳稱此項續歸無着銀款既奉部駁不便照常例辦理自應另議籌補而籌補必期實效再四圖維勢難兼顧因思清查案內歲提羨餘彌補原報無着之款除已補外其餘未補之數約計十餘年即可全行補足是彌補尙有成效應請俟原報無着歸補清完之後再行照案接續提補會詳請

奏前來

臣

查三次清查案內原報無着銀六十萬

餘兩前撫

臣

韓文綺奏請江蘇兩屬每年酌提

羨餘銀八萬三千餘兩按年歸補嗣因被災之年州縣羨餘無出不能一律派提又經

臣

奏准部覆按照災分輕重分別減免續因州縣辦公不敷復經

臣

奏蒙

恩施從道光八年起將原提羨餘減去三成之二是州縣捐解稍已從輕尙可支持所有此項續歸無着銀兩部議不可再行派累州縣亦不可使銀款終歸子虛

臣

與兩藩司反覆籌商非照案

飭提羨餘彌補別無善策惟咨查各省現在尙未覆齊續歸無着銀數若干難以懸擬不能預定年限且因州縣辦公不敷甫經減提羨餘未便與原報無着同時提補應請俟原報無着銀數補足之後再將續歸無着銀款接續提補總以彌補全完之日爲止如此辦理在現任人員既可從容完解免致藉口賠累而清查庫項亦可漸次歸補不至虛懸無着矣是否有當謹會同大學士兩江總督

臣 蔣攸銑合詞恭摺具

奏伏乞

皇上聖鑒

訓示施行謹

奏

道光十年五月二十七日具

奏六月二十九日奉到

硃批戶部議奏欽此

部議覆准

拏獲假照案內要犯摺子

奏爲拏獲假照案內要犯任松字劉東昇二名遵
旨解京審辦出驛具

奏仰祈

聖鑒事竊

臣於前月下旬連奉

諭旨飭拏蔡繩祖龐煥假照案內各要犯業將訪得
劉東昇等蹤蹟併設法查拏各情形附片覆

奏在案其時

臣

已遴派幹員分路踴緝併札臬司

通飭查拏因劉東昇等先已潛逃北上一面飛
飭前途截捕併咨會鄰省各關一體密速偵緝

旋據清河縣知縣加知州銜張心淵稟報於五月二十三日接札卽日在該境賊家馬頭拏獲劉東昇及同行之天津縣人李廷瑞比時長元吳三縣及沿河各州縣兵役俱已趕至一併協獲又據臬司稟報於五月二十七日據委員試用府經歷顧毓奇及未入流金寶山等帶同府縣兵役將任松字訪獲先後批解前來臣卽督同蘇州府訊據任松字供稱年三十七歲曾在捐納房充當貼寫道光六年上退出替蔡繩祖們書寫假照分給銀兩均係貢監未入流等項

其執照板片係劉東昇偷出填寫後藏在蔡繩祖家前後書寫張數及得過銀錢多少記憶不清本年四月內出京行抵蘇州卽被盤獲等語又據劉東昇供稱年四十歲充當捐納房貼寫本年正月因眼目昏花難以寫字退出要想回南祭掃祖墓沒有伴侶託同部雲南司經承王承乾與天津人李廷瑞結伴那李廷瑞每年往南邊置買玉器往來熟悉就搭他的便出京到蘇城程四房客寓住了幾天就往西湖祭墓又到堂母舅金寶山松江寓所住了數日告借貲

斧見他光景窘迫隨即回蘇仍與李廷瑞一同
往北行至清江卽被拏獲至上年八月內周載
控告蔡繩祖龐煥任松宇私給假照一案竝無
小的在內聞說這案假照內有林得先等名字
行查安徽省小的就出來了竝不知情等供查
任松宇劉東昇均係假照案內要犯亟應解部
質究除飭委候補同知高煥臣標署守備浦鈞
管解任松宇劉東昇押赴刑部收審外其與劉
東昇同行之李廷瑞現在因病取保咨查刑部
如案內無名卽行釋放以免拖累此外蔡應聯

賞濬姚鳳山各犯臣仍督屬嚴拏務獲解質毋
稍鬆勁所有拏獲要犯各緣由謹會同大學士
兩江總督臣蔣攸銛恭摺由驛覆
奏伏乞

皇上聖鑒謹

奏

道光十年六月初二日由驛具

奏六月二十日奉到

硃批拏獲甚屬可嘉另有旨欽此又同日奉到道光

十年六月十一日內閣奉

上諭陶澍奏拏獲假照案內要犯解京審辦一摺任松宇劉東昇均與蔡繩祖等同惡相濟係假照案內最要人犯該撫接奉諭旨飭拏卽遴派幹員分路踴緝迅卽就獲甚屬可嘉陶澍着加恩賞加太子少保銜以示獎勵清河縣知縣加知州銜張心淵試用府經歷顧毓奇未入流金寶山俱着送部引見其任松宇劉東昇二犯現經該撫委員解京沿途所過地方着各該督撫酌派員弁按程護解迅速來京勿稍疎虞欽此

遵辦查抄要犯寓所摺子

奏爲要犯任松宇已獲解部遵

旨將該犯寓所財產一併查抄仰祈

聖鑒事 臣於六月初六日承准軍機處字寄欽奉

上諭私捐假照案內要犯任松宇一名現據伊妻弟
夏芬供稱該犯於四月間自直隸阜城縣逃往江
蘇省城開門前中街路陳協茂帽纓店伊胞弟任
嘉穀處居住着該撫卽派委妥員嚴密查拏務獲
迅速解交刑部歸案審辦併將該犯寓所財產一
併查抄如該犯一經就獲卽着由驛馳奏等因欽

此查任松宇與同案要犯劉東昇先經臣飭屬
拏獲由驛

奏明委員解部收審在案彼時任松宇一犯係據
委員等於蘇城北寺地方松雲庵內拏獲並未
在陳協茂帽緯店內茲奉

諭旨飭令查抄該犯寓所財產遵卽密委蘇州府知
府蘇廷玉臣標守備鍾錦文及長洲元和吳縣
知縣馳赴中街路地方查得陳協茂卽陳珮玉
訊據供稱任松宇之弟任嘉穀前在伊店幫夥
業已辭退與其妻錢氏在附近之陳松濤家租

屋居住本年夏間聞得任松宇與妻顧氏自京搬來同住等語隨赴該犯任松宇家查得任嘉穀已先期外出當經逐細查抄任松宇之妻顧氏房內共有皮箱八隻內貯男女衣服及當票錢文又有家用什物並無契據券約等件隨將各物逐件登記封固交吳縣貯庫一面提訊任顧氏據供伊夫任松宇先娶夏氏物故又續娶該氏爲妻夫弟任嘉穀與伊夫同父異母本年四月間伊夫帶同該氏由京來蘇因任嘉穀同妻錢氏租住陳松濤內屋卽與同居每月合出

租錢二千六百文所存衣物盡數抄出此外竝
無隱匿寄頓訊之任錢氏及陳珮玉陳松濤各
供相同除飭拘任嘉穀到案研究併將抄貯衣
物照單咨部聽候行知估變外合將遵辦查抄
緣由恭摺覆

奏伏乞

皇上聖鑒謹

奏

道光十年六月初十日具

奏七月十二日奉到

硃批該部知道欽此

覆訪拏謝孚宸摺片

再臣同日承准軍機大臣字寄欽奉

上諭假照案內龐煥供出謝孚宸亦有假印該員現
捐知縣分發山西據該撫奏前經派委赴部日久
尚未回晉該犯或聞風潛匿或沿途逗留或私往
江浙一帶找尋蔡繩祖任松字等均未可定着卽
派委委員嚴密查拏務獲解部審辦等因欽此臣
查蔡繩祖任松字各犯現已就獲該犯謝孚宸
既有假印知案已破諒必聞風遠遁其蹤蹟尙
難懸定亟應不分畛域分路查緝遵卽行司飛

飭文武衙門併派委妥員赴水陸各要隘處所
嚴密訪拏一俟就獲卽行解部歸案審辦合將
遵

旨飭拏緣由附片覆

奏伏乞

聖鑒謹

奏

道光十年六月初十日具

奏七月十二日奉到

硃批知道了欽此